

## 不教弟子之訓

《菩薩善戒經》〈第四卷〉云：

旃陀羅等，及以屠兒，雖行惡業，不能破壞如來正法，不必定墮三惡道中。為師不能教呵弟子，則破佛法，必定當墮地獄之中。為名譽故，聚畜徒眾，是名邪見，名魔弟子。

## 供養父母之訓

《彌沙塞部五分律》〈第二十卷〉云：

畢陵伽婆蹉，父母貧窮，欲以衣供養而不敢；以是白佛。佛告諸比丘：「若人百年之中，右肩擔父，左肩擔母，極世珍奇，衣食供養，猶不能報須臾之恩！從今聽諸比丘盡心盡壽，供養父母，若不供養，得重罪。」